



JUDICIAL SYSTEM MONITORING PROGRAMME
PROGRAMA MONITORIZASAUN BA SISTEMA JUDISIÁRIU

Komunikadu Imprensa
Distritu Oe-Cusse
01 Dezembru 2014

JSMP kontinua organiza treinamentu kona-ba justisa ba ema hotu iha Suku Lifau, Distritu Oe-Cusse

Iha 25 Novembru 2014, Unidade Peskizador Juridiku (*Legal Research Unit-LRU*), JSMP realiza treinamentu kona-ba asesu ba justisa formal ba comunidade iha Suku Lifau, Distritu Oe-Cusse.

Treinamentu ne'e partisipa hosi ema hamutuk nain 30, ne'ebé kompostu hosi fetu nain 15 no mane nain 15. Partisipante sira ne'e mai hosi estrutura suku, representante grupu fetu, joventude fetu no membru comunidade fetu sira.

Materia treinamentu sira ne'ebé apresenta no diskuti durante sesaun treinamentu ne'e mak kobre asuntu sira kona-ba konseitu baziku kona-ba diretus umanus, lei formal ne'ebé vigor iha Timor Leste, provizaun relevantes sira iha kódigo penál, kodigo prosesu penal no tipu kazu krime sira ne'ebé maioria akontese iha sosiedade.

Aleinde ne'e, diskuti mós kna'ar no responsabilidade institucionál hosi kada autór judisiáriu hanesan juis, ministériu públiku no ajente prosesual sira hanesan defensor públiku, advogadu privadu, polisia no oinsa atu asesu ba justisa formal wainhira sai nu'udar akuzadu ka sai hanesan vítima husi krime ruma.

“Treinamentu ne'e hanesan atividade kontinuasaun hodi habelar informasaun ba comunidade sira kona-ba asesu ba justisa formal no hasa'e koñesimentu hosi grupu alvu sira iha suku sira kona-ba lala'ok oinsa mak bele prosesu sira nia kazu atraves hosi justisa formal no lei aplikavel, ” dehan Diretór Ezekutivu JSMP, Luis de Oliveira Sampaio.

Xefe Suku Lifau, Sr. João da Costa iha sesaun abertura hateten katak comunidade iha Suku Lifau apresia JSMP nia prezensa no inisiativa hodi divulga informasaun relevantes sira kona-ba lala'ok justisa formal ne'e ba sira. Xefe Suku subliña katak informasaun ne'e importante no útil tebes ba sira nia suku. Dala barak krime violénsia doméstika no krime sira seluk ne'ebé akontese iha sira nia suku maibé sira rasik lahatene dalan oinsa mak atu prosesu kazu sira ne'e tanba ne'e dala barak rezolve iha nivel suku no aldeia.

JSMP observa katak partisipantes sira, sei kontinua hetan konfuzau kona-ba krime violénsia doméstika. Sira prefere katak kazu violénsia doméstika rezolve deit iha nivel suku ka aldeia deit tanba krime violénsia doméstika konsidera hanesan bikan ho kanuru mak baku malu. Tanba ne'e JSMP, hanoin katak atividade divulgasaun informasaun legál sira, atu fasilita comunidade sira iha kompresauun adekuada ba provizaun legál aplikável sira.

Aleinde ne'e xefe suku sujere ba JSMP, karik iha futuru bele realiza treinamentu ho asuntos hanesan iha nivel aldeia sira hodi involve comunidade ne'ebé barak liutan.

JSMP observa katak partisipante sira ativu teb-tebes atu husu perguntas relasiona ho krime violénsia doméstika no fasilitador responde tuir lei ne'ebé vigora partikularmente kona-ba prezensa Lei Kontra Violénsia Doméstika katak krime violénsia doméstika hanesan krime públiku.

JSMP hein katak ho atividade treinamentu ne'e, bele kontinua hametin diak liutan koñesimentu comunidade iha área rural sira no liu-liu atu fasilita sira kona-bá opsau oinsa atu trata kazu ho natureza krime semi públiku no públiku ne'ebé involve sira nia membru familia.

Treinamentu ne'e realiza ho apoiu finanseiru husi **UNDEF**.

Atu hetan informasaun kle'an favor kontaktu direktamente:

Luis de Oliveira Sampaio

Diretór Ezekutivu JSMP

Diresaun e-mail: luis@jsmp.minihub.org

info@jsmp.minihub.org

telefone: 3323883/77295795

webiste: www.jsmp.tl

facebook www.facebook.com/timorleste.jsmp

twitter: @JSMPtl